

Na osnovu člana 15. Zakona o principima lokalne samouprave u Federaciji BiH („Službene novine Federacije BiH“, br. 49/06 i 51/09), Smjernica o minimalnim standardima dodjele budžetskih sredstava putem transfera i subvencija u Federaciji BiH („Službene novine Federacije BiH“, br. 37/24), člana 107. Statuta Općine Ilijaš („Službene novine Kantona Sarajevo“ 20/09-prečišćeni tekst i 46/18) i Odluke Općinskog vijeća Ilijaš o odobravanju i isplati sredstava na ime sufinansiranja troškova osiguranja potrebnih tretmana i terapija za djecu sa poteškoćama u razvoju („Službene novine Kantona Sarajevo“, broj. 14/25), Općinski načelnik donosi:

P R A V I L N I K

o uslovima i načinu ostvarivanja prava na ime troškova osiguranja potrebnih tretmana i terapija za djecu sa poteškoćama u razvoju

I OSNOVNE ODREDBE

Član 1. (Predmet)

(1) Predmet ovog Pravilnika je utvrđivanje kriterija za dodjelu novčane pomoći iz Budžeta Općine Ilijaš na ime troškova osiguranja potrebnih tretmana i terapija za djecu sa poteškoćama u razvoju, iznos sredstava koja se dodjeljuju, postupak za ostvarivanje novčane pomoći, kao i druga pitanja od značaja za dodjelu novčane pomoći.

(2) Pod terminom "djeca sa poteškoćama u razvoju", u smislu ovog Pravilnika podrazumijevaju se djeca ometena u fizičkom i psihičkom razvoju.

Član 2. (Cilj)

Cilj dodjele novčane pomoći je olakšati porodicama u troškovima potrebnih tretmana i terapija djece sa poteškoćama u razvoju, a koji su neophodni za osposobljavanje za samostalan život.

Član 3. (Osiguranje sredstava)

(1) Sredstva planirana u Budžetu Općine Ilijaš na poziciji „Tekući transferi pojedincima“ - sufinansiranje troškova osiguranja potrebnih tretmana i terapija namjenski će se koristiti na ime troškova definisanih članom 1. ovog Pravilnika.

(2) Pravo na novčanu pomoć za djecu sa poteškoćama u razvoju ostvaruje se kao mjesečna novčana naknada u iznosu od 120,00 KM.

II JAVNI POZIV

Član 4. (Javi poziv)

(1) Pravo na dodjelu novčane pomoći djeca sa poteškoćama u razvoju ostvaruju putem Javnog poziva koji se objavljuje na web stranici Općine, Facebook i Instagram stranici Općine Ilijaš i ostaje otvoren do kraja tekuće budžetske godine.

(2) Novčana pomoć utvrđena ovim Pravilnikom ostvarivat će se na osnovu podnesenih zahtjeva, a u skladu sa objavljenim javnim pozivom.

(3) Novčana pomoć utvrđena ovim Pravilnikom za 2025. godinu ostvarit će se na način da će se novčana pomoć djeci sa poteškoćama u razvoju priznati od 01.04.2025. godine, shodno članu 8. Odluke o odobravanju i isplati sredstava na ime sufinansiranja troškova osiguranja potrebnih tretmana i terapija za djecu sa poteškoćama u razvoju ("Službene novine Kantona Sarajevo", broj:14/25).

(4) Novčana pomoć za djecu čiji je stepen invaliditeta utvrđen nakon 01.04.2025. godine priznati će se od momenta prvosnažnosti rješenja o utvrđenom invaliditetu.

(5) Pravo na dodjelu novčane pomoći djece sa poteškoćama u razvoju za naredni period će se ostvarivati putem Javnog poziva iz stava (1) ovog člana, a priznavat će se od dana donošenja Odluke o odobravanju finansijskih sredstava.

(6) Zahtjevi iz stava (2) ovog člana podnose se Službi za opću upravu, boračko-invalidsku i socijalnu zaštitu (u daljem tekstu: Služba) putem protokola Općine, na propisanom obrascu - Zahtjev za odobravanje sredstava na ime sufinansiranja troškova osiguranja potrebnih tretmana i terapija za djecu sa poteškoćama u razvoju, koji čini sastavni dio ovog Pravilnika.

III SADRŽAJ JAVNOG POZIVA

Član 5. (Sadržaj javnog poziva)

Javni poziv treba da sadrži sljedeće elemente:

- Predmet javnog poziva;
- Pravo na dodjelu novčane pomoći;
- Uslovi za dodjelu novčane pomoći;
- Potrebna dokumentacija i
- Postupak podnošenja zahtjeva i dodjele novčane pomoći.

IV OSTVARIVANJE PRAVA

Član 6. (Kategorije)

Pravo na novčanu pomoć na ime troškova osiguranja potrebnih tretmana i terapija za djecu sa poteškoćama u razvoju, mogu ostvariti djeca sa poteškoćama u razvoju kojima je pravosnažnim rješenjem nadležnog organa utvrđen stepen invaliditeta, djeca do polaska u školu, djeca koja se školuju i borave u školskim, odnosno predškolskim ustanovama, kao i nekim drugim ustanovama, a radi osposobljavanja za samostalan život, do navršenih 26 godina života, a najkasnije do navršenih 29 godina života, ukoliko borave u ustanovi.

Član 7. (Uslovi za ostvarivanja prava)

(1) Uslovi za ostvarivanje prava na novčanu pomoć na ime troškova osiguranja potrebnih tretmana i terapija za djecu sa poteškoćama u razvoju:

- da je dijete državljanin Bosne i Hercegovine;
- da podnosilac zahtjeva i dijete imaju prebivalište na području općine Ilijaš;
- da je jedan od roditelja djeteta državljanin Bosne i Hercegovine;
- da je dijete kategorisano, odnosno da ima utvrđen stepen invaliditeta i
- da se školuje ili boravi u predškolskoj ustanovi ili nekoj drugoj ustanovi radi osposobljavanja za samostalan život.

(2) U slučaju da jedan od roditelja ili staratelja nema prijavljeno prebivalište na području općine Ilijaš do dana podnošenja zahtjeva za dodjelu novčane pomoći na ime troškova osiguranja potrebnih tretmana i terapija za djecu sa poteškoćama u razvoju, isti je dužan dostaviti dokaz da isto pravo nije za to dijete ostvario u općini gdje ima prijavljeno prebivalište.

Član 8. **(Postupak ostvarivanja prava)**

(1) Novčana pomoć utvrđena ovim Pravilnikom ostvarivat će se na osnovu podnesenih zahtjeva, a u skladu sa objavljenim javnim pozivom.

(2) Korisnici koji ispunjavaju uslove iz člana 7. ovog Pravilnika, prilikom podnošenja zahtjeva dužni su dostaviti sljedeću dokumentaciju:

- Čitko popunjen i potpisan obrazac Zahtjeva;
- Ovjerena izjava o zajedničkom domaćinstvu (kućna lista);
- Izvod iz matične knjige rođenih za dijete;
- Izvod iz matične knjige državljana za dijete;
- Izvod iz matične knjige državljana za roditelja odnosno staratelja;
- Prijava prebivališta za dijete;
- Prijave prebivališta za roditelje odnosno staratelja;
- Rješenje nadležnog organa o utvrđivanju stepena invaliditeta donijeto u skladu sa Nalazom, ocjenom i mišljenjem Instituta za medicinsko vještačenje zdravstvenog stanja Sarajevo i
- Potvrdu ili uvjerenje od ustanove da dijete istu redovno pohađa;
- Za roditelja koji nema prijavljeno prebivalište na području općine Ilijaš, uvjerenje općine u kojoj ima prijavljeno prebivalište da nije korisnik pomoći za djecu sa poteškoćama u razvoju;
- Rješenje nadležnog Centra za socijalni rad o starateljstvu, ukoliko prijavu na javni poziv za dijete podnosi staratelj;
- Presuda o razvodu braka, ako su roditelji djeteta razvedeni;
- Uvjerenje o slobodnom bračnom stanju, za roditelje djeteta koji nisu stupili u brak;
- Potvrda banke o otvorenom tekućem računu na ime podnosioca prijave.

V POSTUPANJE PO ZAHTJEVU I DONOŠENJE ODLUKE

Član 9. **(Postupanje po zahtjevu)**

(1) Služba će u roku od 15 dana od dana podnošenja zahtjeva utvrditi ispunjenost formalno pravnih uslova za učešće u Javnom pozivu, te predložiti Općinskom načelniku Odluku o odobravanju finansijskih sredstava na ime podnosioca zahtjeva.

(2) Ukoliko podnosilac zahtjeva ne ispunjava uslove propisane Javnim pozivom, Služba će donijeti Odluku kojom se zahtjev odbija.

(3) Protiv Odluke iz stava (2) ovog člana, podnosilac zahtjeva ima pravo uložiti žalbu u roku od petnaest (15) dana od dana prijema Odluke, Drugostepenoj stručnoj komisiji Općinskog vijeća.

(4) Odluka Drugostepene komisije iz stava (3) ovog člana je konačna.

VI OBAVEZE NADLEŽNE SLUŽBE I KORISNIKA PRAVA

Član 10. (Obaveze nadležne Službe)

Nadležna Služba dužna je pratiti ostvarivanje prava na dodjelu novčane pomoći djeci sa poteškoćama u razvoju, te na propisan način voditi evidencije i dokumentaciju o ostvarivanju prava.

Član 11. (Obaveze korisnika prava)

Tokom ostvarivanja prava na novčanu pomoć djeci sa poteškoćama u razvoju korisnik je dužan u roku od petnaest (15) dana prijaviti svaku promjenu koja utiče na ostvarivanje prava, a shodno odredbama člana 6. ovog Pravilnika.

VII ISPLATA FINANSIJSKIH SREDSTAVA

Član 12. (Način isplate)

Finansijska sredstva uplaćivat će se u skladu sa Odlukom o odobravanju finansijskih sredstava na tekući račun podnosioca zahtjeva.

VIII PRELAZNE I ZAVRŠNE ODREDBE

Član 13. (Stupanje na snagu)

Ovaj Pravilnik stupa na snagu narednog dana od dana donošenja.

Broj: 02/2-31-995/25
Datum: 26.08.2025.godine



OPĆINSKI NAČELNIK

Amir Dovadžija